

JEMS

¹ E Jems. E Tamo Koba Yesus Kristus aqa Abu Qotei wo nanngo wau tamo. Israel nanngo moma utru 12 nanngo len agi ningi. O was ningi kalil kaiye. E na anjam endi nenngrenyosim nunngoq qarinyonum. Ningi nunngo segi segi qure utru uratosib jaraiyosib sawa sawa kalil keretosib di unub.

Iga gulbe qoboieqnum dena iga singila eqnum

² O ijo was, gulbe utru segi segi gargekoba nunngoq boqnimqa ningi gulbe deqa tulan arebole-boleingim soqniy. ³ Gulbe deqaji nunngoq boqnimqa ningi nunngo areqalo Yesus qa bole singilatqab kiyo sai kiyo di Qotei a geregere unqas. Ningi qalie, gulbe dena ningi singilatngeqnaqa ningi gulbe qoboieqnum. ⁴ Deqa ningi bati gaigai singila na tigeloqnsib gulbe qoboioqniy. Ningi degyqab di ningi Qotei aqa kumbra bei qa truquoqnasai. Ningi tulan kere na sqab.

Tamo bei a powo qa truquosimqa a Qotei pailym Qotei na powo yqas

⁵ Ariya tamo bei a powo qa truquosimqa a Qotei pailym. Yimqa Qotei na a powo yqas. Ningi qalie, Qotei a tamo unqasari kalil nanngi ingi bole bole enjreqnu. Nanngi Qotei pailyeqnaq a nanngi qa olo niriṅosaieqnu. ⁶ Ariya tamo bei a Qotei pailyqa osimqa a are gulbeiyaiq. Osim endegsi maraiq, “Qotei na ingi bole ebqas kiyo sai kiyo?” A degsi maraiq. A Qotei qa aqa areqalo singilatosim pailym. Jagwa tigelosiq yuwal korkortoqnsiqa

oqe aiyeqnu dego kere tamo are gulbeiyeqnu qaji a bati bei Qotei qa aqa areqalo singilatoqnsiqa olo bati bei aqa areqalo singilatosaiqnu. ⁷ Tamo Koba a na tamo deqaji nanği inği bei enjrqsai. Deqa tamo deqaji nanği endegsib are qalaib, “Iga inği bole bole oqnqom.” Di sai. ⁸ Nanği areqalo aiye aiyeltoqnsib kumbra laņa laņa yeqnu deqa Qotei na nanği inği bei enjrqsai.

Jems a ñoro tamo ti tamo inği saiqoji nanği ti anjam minjrej

⁹ Kristen was bei a ñam saiqoji soqnimqa a areboleboleyem. Di kiyaga? A Qotei aqa ñamgalaq di ñam koba ti unu deqa. ¹⁰ Tamo bei ñoro koba ti unu qaji a dego areboleboleyem. Di kiyaga? A Qotei aqa ñamgalaq di ñam saiqoji unu deqa. Tamo nanği ñoro koba koroiyqajqa arearetnjreqnu qaji nanği balamtamo aqa so bulosib sokiñalayosib morenqab. ¹¹ Iga qalie, seņ oqsim kanķanķamqa balamtamo aqa so laosim moiym aqa wala bole di koboqas. Dego kere tamo nanği ñoro koba ti unub qaji nanği wau bei bei yoqnsib bati qujai qa urur morenosib koboqab.

Qotei na iga are qametgosaieqnu

¹² Tamo unğasari gulbe qoboiyoqnsib singila na tigelejunub qaji nanği areboleboleinjreme. Mondonj Qotei a nanği qa tulaņ arearetim awai boledamu enjrim nanği ñambile gaigai sqab. Qotei a marej, “E na tamo kalil e qalaqalaibeqnu qaji nanği awai bole enjrqai.” Qotei a degsi marej. ¹³ Deqa tamo bei a une atqajqa are prugyimqa a endegsi maraiq, “Qotei na are qametbqoqa e une atqajqa are prugbeqnu.” A degsi maraiq.

Iga na Qotei aqa are qametim a une yqa keresai dego kere Qotei na iga une atqajqa are qametgo-saieqnu. ¹⁴ Gago segi segi are miligi tigelognsiqa iga titgeqnu. Gam dena gago segi areqalo uge na iga uneq breigwa oqnsiqa walawalaigoqnsiqa gisanjeqnu. ¹⁵ Gago are miligi tigeleqnu di unja a gumanjeqnu dego kere. Bunuqna unja a anjroteqnu dego kere gago are miligi tigelognsiqa une babteqnu. Yeqnaqa gago une di tulan kobaeqnaqa iga moiyo gam tureqnum.

¹⁶ O ijo was bole, une aqa kumbra dena ninji gisanjaim deqa ninji une kalil uratiy. ¹⁷ Inji bole bole kalil Qotei na iga egeqnu qaji di lan goge na branteqnaq iga lanja elejeqnum. Abu Qotei suwanjoq di unu qaji a na inji di qarinyeqnaqa gagoq beqnu. Qotei a kumbra bubulyosaieqnu. A sen qunun bul sai. Sen qunun a olekobaoqnsiqa olo trueqnu Qotei a degyosaieqnu. ¹⁸ A aqa segi areqalo dauryosiq iga gereigej deqa a gago Abu. A aqa anjam bole na iga gereigej deqa iga inji meli bunuj bulosim inji inji kalil a nami gereinjrej qaji di tulan bunjrejunum.

Iga Qotei aqa anjam lanja quqwasai

¹⁹ O ijo was bole, ninji endegsi poingem. Ninji anjam bei marqa osibqa urur medabu waqtaib. Mati didaboqniy. Urur minjin oqaiq. ²⁰ Tamo nanji urur minjin oqetnjreqnu qaji nanji Qotei aqa kumbra bole dauryqa keresai. ²¹ Deqa ninji kumbra uge uge jigat kalil taqal waiyoqniy. Osib nunjo segi ñam aguq atoqnsib Qotei aqa anjam a na nami nunjo are miligiq di atej qaji di ninji ojesoqniy. Ojesqab di Qotei a nunjo qunun oqas.

²² Ariya ningi Qotei aqa anjam di bole dauryoqniy. Laña qusib olo urataib. Ningi laña quqwab di ningi nungo segi jejamu gisanycab. ²³ Tamo bei a Qotei aqa anjam laña quoqnsiq olo dauryqa urateqnu di a tamo ya jeqiloq di aqa ulatamu uneqnu dego bul. ²⁴ A ya jeqiloq di aqa ulatamu unsim olo puluosim giloqnsim aqa ulatamu unqo qaji di a olo are walyqas. ²⁵ Qotei aqa dal anjam bunuj unu. Dal anjam di bole tintinj. Qotei a gago une aqa singila kobotetgwa osiqa dal anjam di iga egej. Deqa gago une na iga olo ojqa keresai. Tamo nanqi dal anjam di geregere peleiyocnsib dauryocncab di Qotei a nango wau kalil boletocncas. Ariya tamo nanqi dal anjam di laña qusib olo are walnjrcas di Qotei a nango wau bei boletcasai.

²⁶ Tamo bei a endegsi are qalqas, “E gaigai Qotei qa loueqnum. Deqa e Kristen tamo bole.” Ariya tamo di a aqa segi medabu geregere taqatcasai di a na aqa segi jejamu gisanycas. Deqa a Qotei qa loueqnu di a laña loueqnu. ²⁷ Iga Kristen tamo ungasari unum deqa iga kumbra bole endeqaji yoqncqm. Iga na angro mandum nanqi ti unqa qobul nanqi ti geregereinjroqnsim nango gulbe kalil qoboiyetnjrcqm. Osim iga gago segi walwel taqatosim mandam endeqa kumbra jigat kalil uratekriticqm. Iga kumbra deqaji yoqncqm di iga Qotei aqa namgalaq di Kristen tamo bole une saiqoji sqom.

2

Ningi na tamo kalil nanqi turtnjrsib kumbra qu-jai enjroqniy

¹ O ijo was kalil, gago Tamo Koba Yesus Kristus a rian koba ti unu. Ningi a qa nungo areqalo singilateqnub deqa e ningi endegsi mernḡwai. Ningi na tamo ñam ti nanḡi areinjroqnsib olo tamo ñam saiḡoji nanḡi qoreinjroqnaib. ²⁻³ Nunḡo kumbra agiende. Ñoro tamo bei a gara boledamu na walaosim banḡriḡ gol na gereiyo qaji di jigsim nunḡo Qotei tal miligiq gilqas di ningi aqa ñam soqtqab. Osib a geregereiyosib minjibqa awo jaram boleq di awoqas. Ariya tamo bei inḡi inḡi saiḡoji a gara jigat branḡo jigsimqa Qotei tal miligiq gilqas di ningi aqa ñam aguq atsib minjqab, “Ni qalaq di tigelesoqne” o “Ni mandamq di awo.” ⁴ O ijo was, ningi kumbra degyeqnub di ningi areqalo uge ti sosib tamo nanḡi lanḡa peginjreqnub.

⁵ O ijo was bole, ningi quiy. Tamo unḡasari inḡi inḡi saiḡoji nanḡi Qotei na giltḡnrej deqa nanḡi torei a qa nanḡo areqalo singilateqnub. Agi Qotei a nami endegsi marej, “Tamo unḡasari e qalaqalaibeqnub qaji nanḡi di e na taqatḡnrsiy nanḡo Mandor Koba sqai.” ⁶ O ijo was, ningi kiyayaqa tamo inḡi inḡi saiḡoji nanḡo ñam aguq ateqnub? Ningi are qaliy. Yai nanḡi na ningi ugeugeinḡoqnsib nunḡo jejamuq di une enḡoqnsib ningi joqoqnsib anjam pegiyo talq di tigeltḡneqnub? Ñoro tamo nanḡi na ningi degḡneqnub. ⁷ Tamo nanḡi dena Yesus aqa ñam boledamu misilinḡeyeqnub. Ñam di agi Qotei a nunḡoq di atej unu.

⁸ Mandor Koba Qotei aqa dal anjam bei nami endegsib nenḡrenḡyeb unu, “Ni ino segi jejamu gereiyeqnum dego kere tamo unḡasari nanḡi

degsim gereinjroqñime.” O ijo was, ningi dal anjam di dauryosib keretqab di ningi kumbra bolequja yqab. ⁹ Ariya ningi na tamo qudei nanği areinjroqñsib olo tamo qudei nanği qoreinjreçnub di ningi une ateqñub. Deqa ningi dal anjam gotrañyo qaji tamo brantonub. ¹⁰ Tamo bei a dal anjam mutu kalil dauryekritosim ariya qujai bole qujai grotqas di a dal anjam mutu kalil grotekrito. Deqa aqa jejamuq di gulbe sqas. ¹¹ Iga qalie, Qotei a nami dal anjam endegsi marej, “Ni tamo bei aqa uña jejamu ojetaim.” Osiqa dego marej, “Ni tamo bei qalsim moyotaim.” Bole, ni tamo bei aqa uña jejamu ojetosaieqñum. Ariya ni tamo bei qalsim moyotqam di ni dal anjam gotrañyo qaji tamo brantqam. ¹² Qotei a gago une aqa siñgila kobotetgwa osiqa dal anjam bunuj egej. Deqa gago une na iga olo ojqa keresai. O ijo was ningi quiy. Qotei a dal anjam deqa are qalsim iga pegigwas. Deqa ningi nunço anjam maro ti nunço kumbra ti kalil geregere taqatoqñiy. ¹³ Ningi tamo nanği qa dulqasai di une pegiyo bati qa Qotei a kamba dego ningi qa dulqasai. Ariya ningi tamo nanği qa duloqñqab di une pegiyo bati qa ningi une saiçoji sqab.

Tamo a Yesus qa aqa areqalo siñgilatqas di a kumbra bole babtoqñqas

¹⁴ O ijo was ningi quiy. Tamo bei a mareqñu, “E Yesus qa ijo areqalo siñgilateqñum.” A degsi maro-qñsiq ariya a kumbra bole bei yala babtosaieqñu. Laña medabu na anjam mareqñu. Deqa tamo di Qotei na oqasai. ¹⁵⁻¹⁶ Kristen was bei a gara saiçoji kiyo inği saiçoji kiyo soqñimqa nunço ambleq di

tamo bei na minjqas, “Ni lawo na gilsim gara bei osim jigsim inji uysim menetmim soqne.” A anjam segi laña minjqo deqa anjam dena kiyersim a aqaryaiyqas? Keresai. ¹⁷ Dego kere iga Yesus qa gago areqalo siŋgilatosim ariya iga kumbra bole bei babtosaieqnum di iga laña gago areqalo Yesus qa siŋgilateqnum. Deqa iga tamo moisiq aqa jejamu laña unu dego bul sqom.

¹⁸ Tamo bei a endegsi marqas, “E Yesus qa ijo areqalo siŋgilateqnum.” Degsi marimqa e na kamba minjqai, “O was, ni kumbra bole bei babtosaieqnum. Deqa e kiyersiy qalieqai, ni bole Yesus qa ino areqalo siŋgilateqnum? E qalieqa keresai. Ariya e Yesus qa ijo areqalo siŋgilatosiy kumbra bole dego turtosiy yoqnqai di ni e nubsim merbqam, ‘Bole, ni ino areqalo Yesus qa bole siŋgilateqnum.’ ¹⁹ Ni mareqnum, ‘Bole, Qotei a segi qujai unu.’ Ni kere mareqnum. Mondor uge nanqi dego degsib maroqnsib Qotei ulaiyeqnum. ²⁰ Ni nanari tamo. Ni mareqnum, ‘E Yesus qa ijo areqalo siŋgilateqnum.’ Ni degsi maroqnsim ariya ni olo kumbra bole bei babtosaieqnum. Deqa ni laña medabu na mareqnum. Ni ijo anjam endi poimqa are soqnim poimeme.” ²¹ O ijo was niŋgi quiy. Nami gago moma utru Abraham a na aqa aŋgro qujai Aisak osiq Qotei atraiyqa marsiq atra bijalq di atej. Atnaqa Qotei a Abraham aqa kumbra di unsiqa minjej, “Ni degyonum deqa ni ijo ŋamgalaq di tamo bole une saiqoji unum.” ²² Niŋgi are qaliy. Abraham a Qotei qa aqa areqalo siŋgilatosiq kumbra bole dego turtosiq yej. Aqa areqalo Qotei qa siŋgilatej qaji de ti aqa kumbra bole ti aiyeltosiq dauryej. Deqa iga endegsi mar-

qom, Abraham aqa kumbra bole dena aqa areqalo Qotei qa singilatej qaji di taqyosiq tulan keretej.

²³ Deqa Qotei aqa anjam bei nami nengrenyeb qaji aqa damu brantej. Anjam agiende, “Abraham a Qotei qa aqa areqalo singilatej deqa Qotei na minjej, ‘Ni ijo namgalaq di tamo bole une saiqoji unum.’” Osiga Abraham minjej, “Ni ijo was bole.”

²⁴ Deqa ijo was ningi qalie, tamo nanngi Yesus qa nanngo areqalo singilatosib ariya nanngi olo kumbra bole bei babtqasai di nanngi Qotei aqa namgalaq di tamo bole une saiqoji sqa keresai. Tamo nanngi Yesus qa nanngo areqalo singilatoqnsib kumbra bole dego turtosib yeqnub qaji nanngi segi Qotei aqa namgalaq di tamo bole une saiqoji unub.

²⁵ Ningi sambala unja Rahap a qa dego are qaliy. Rahap aqa kumbra bole agiende. Josua a tamo aiyel nanngi qarinnjrnaqa Jeriko qureq gilnabqa qure deqaji nanngi na tamo aiyel nanngi di numqa laqnab Rahap a nanngi aiyel ulitnjrej. Osiga gam bei osornjrnaqa nanngi jeu tamo nanngi alelnjrsibqa jaraiyeb. Rahap a kumbra bole di yej deqa a Qotei aqa namgalaq di unja bole une saiqoji soqnej. ²⁶ Iga qalie, tamo a me mondor ti sqasai di a moiqas. Dego kere tamo bei a Yesus qa aqa areqalo singilatosim ariya a olo kumbra bole babtqasai di a tamo moisiq aqa jeamu laja unu dego bul sqas.

3

Iga gago segi medabu geregere taqatqom

¹ O ijo was kalil, tamo quja quja segi Qotei aqa anjam palontoqnebe. Tamo gargekoba nanngi

anjam palontoqnaib. Niŋgi qalie, mondoŋ une pegiyo batiamqa Qotei na anjam palonto tamo nanŋo wau qa geregere peginjrqas. ² Bati gaigai iga kumbra gro groyeqnum. Ariya iga gago anjam maro qa grotqasai di iga tamo bolequja sqom. Sosimqa gago baŋ ti siŋga ti jejamu ti kalil geregere taqatqom. ³ Iga hos nanŋo med-abuq di sil atoqnsim nanŋi titnjreqnam nanŋi iga daurgeqnum. Iga nanŋo medabu segi ojeqnam nanŋo jejamu dego iga daurgeqnu. ⁴ Niŋgi qobuŋ uniy. Qobuŋ a tulaŋ kobaquja. Aqa kuŋi tulaŋ kiŋala. Ariya jagwa koba tigelosiq qobuŋ tutqa laqnaqa qobuŋ aqa abu na kuŋi ojoqnsiq tingite-qnaq qobuŋ a dauryoqnsiq gileqnu. ⁵ Dego kere gago medabu kiŋala. Ariya a diq koba yeqnu. Iga gago medabu waqtoqnsim gago segi ñam soqtoqnsim diqoqnsim anjam mareqnum.

Iga qalie, ŋamyuwo yusiq tulaŋ kobaqujaoqnsiq ŋamtaŋ kalil yueleneqnu. ⁶ Gago medabu a ŋamyuwo bul. Iga gago medabu waqtoqnsim dena iga kumbra uge uge yoqnsim gago jejamu kalil tulaŋ jigateqnum. Mondoŋ tamo nanŋi ŋamyuwoq aisib padalqab dego kere gago medabu na gago so tulaŋ ugeugeiyeqnu. ⁷ Niŋgi wagme nanŋi qa are qaliy. Wagme ti qebari ti qe ti kalil iga na taqatnjreqnum. ⁸ Ariya iga gago medabu taqatqa keresai. Iga gago medabu na gaigai anjam uge uge mareleneqnum. Amal uge na tamo nanŋi uñinjroqnsib moiyoŋnjreqnub dego kere gago medabu na iga kumbra uge ugeq breigeqnu. ⁹ Gago kumbra agiende. Iga gago medabu waqtoqnsim gago Tamo Koba Abu Qotei aqa ñam soqto-

qnsim olo puluoqnsim medabu qujai dena tamo ungasari nanngi misilinjnreqnum. Tamo ungasari nanngi di Qotei na gereinjrsiqa aqa segi so boleq di atej. ¹⁰ Iga kumbra uge deqaji yeqnum. Agi iga gago medabu waqtoqnsim Qotei aqa ñam soqtoqnsim olo medabu qujai dena anjam uge uge mareleñeqnum. O ijo was, gago kumbra di ugedamu. ¹¹ Ya jumbum qujaiq na ya bole ti ya uge ti brantqa keresai. ¹² Qura na oliv aqa gei oqa kere e? Wain sil na qura aqa gei oqa kere e? Yuwal a ya bole bulyqa kere e? Sai.

Tamo powo bole ti unub qaji nanngi kumbra bole bole yoqnebe

¹³ Nunngo ambleq di tamo qudei nanngi qalie ti powo ti unub kiyo? Sqab di nanngi nanngo segi ñam aguq atoqnsib kumbra bole bole yoqnebe. Yim tamo ungasari nanngi nanngo kumbra di unoqnsib maroqnqab, “Nanngi tamo bole.” ¹⁴ Ariya ninngi olo nunngo segi jejamu qa are qaloqnsib laña are ugeinñoqnm diqoqnaib. Ninngi degyqab di ninngi gisan kumbra dauryosib Qotei aqa anjam bole ugetqab. ¹⁵ Osib ninngi powo uge ti sqab. Powo deqaji lañ goge na bosai. Di mandam qaji powo. Di gago areqalo namij aqa powo. Powo di Satan aqaq na beqnu. ¹⁶ Ninngi quiy. Tamo ungasari nanngi nanngo segi jejamu qa are qaloqnsib laña are ugein-jroqnm diqoqnqab di nanngi so tulan ugeq di sosib kumbra uge uge yoqnqab. ¹⁷ Ariya tamo ungasari lañ goge na powo eqnub qaji nanngi kumbra tulan bolequja yeqnub. Nanngi kumbra jigat dauryo-saieqnub. Nanngi lawo na sosib tamo nanngi jinnga na gereinjroqnsib nanngi qa duloqnsib kumbra bole

bole osornjreqnub. Nanği na tamo kalil nanği turtnjroqnsib kumbra qujai enjreqnub. Nanği laña baban na Qotei aqa kumbra dauryosaieqnub. Nanği bole dauryeqnub. ¹⁸ Tamo deqaji nanği lawo na sosib are qujaitoqnsib jeu turyoqnsib kumbra bole tinğinğ babteqnub. İnği meli branteqnu dego kere.

4

Tamo bei na mandam qaji kumbra qalaqalaiyqas di a olo Qotei jeutqas

¹ O ijo was, ninği qudei nunğo segi jejamu qa areboleboleinğeqnaqa kumbra uge uge yqa-jqa are prunğeqnu. Utru deqa ninği qotoqnsib nirinğkobaieqnub. Kumbra di nunğo jejamu miligiq di sinğila na waueqnu. ² Ninği inği inği koba oqajqa tulan arearetnğeqnaqa mamaulnğeqnu. Ariya ninği inği inği di osaieqnub deqa ninği qoto tigeltoqnsib tamo ñumeqnub. Ninği inği inği di osaieqnub di aqa utru agiende. Ninği Qotei pailyosaieqnub deqa. ³ Ninği qudei inği inği qa Qotei pailyoqnsib ariya ninği inği inği di osaieqnub. Di kiyaaqa? Ninği nunğo segi jejamu qa areboleboleinğwajqa maroqnsib areqalo uge na pailyeqnub deqa. ⁴ Unğa bei na aqa gumbulunğ uratosiq olo tamo bei ombla sambala kumbra yeqnub dego kere ninği Qotei uratoqnsib kumbra uge uge yeqnub. Ninği quiy. Tamo bei na mandam qaji kumbra qalaqalaiyqas di a olo Qotei jeutqas. Ninği di qaliesai kiyo? Od, tamo bei na mandam qaji kumbra qalaqalaiyqa are qalqas di a Qotei jeutqas. ⁵ Agi Qotei aqa anjam bei nami endegsib nenğrenğyeb unu, “Qotei na aqa

Mondor gago are miligiq di atej unu. Mondor di a iga qa tulan areareteqnu.” O ijo was, ningi anjam di laña sa anjam edegaib.

⁶ Qotei a iga qa are tulan boleiyeqnu. Deqa aqa anjam bei nami endegsib nenjrenjyeb unu, “Tamo ungasari nanngo segi ñam soqteqnu qaji nanngi Qotei na olo jeutnjreqnu. Ariya tamo ungasari nanngo segi ñam aguq ateqnub qaji nanngi qa Qotei a olo are boleiyeqnu.” ⁷ Deqa ijo was, ningi nunngo segi ñam aguq atoqnsib Qotei aqa sorgomq di soqniy. Sosibqa Satan gotranjyoqniy. Yimqa Satan na ningi uratngosim ulanqas. ⁸ Ningi Qotei jojomyoqniy a kamba dego ningi jojomngooqniy. O une tamo, ningi quiy. Tamo nanngi nanngo ban yansoqnsib jiga koboteqnu dego kere ningi nunngo are miligi gereiyooqnsib bulyoqniy. Ningi areqalo aiye aiyelteqnu qaji olo nunngo are miligiq dena jiga kalil taqal atoqniy. ⁹ Ningi nunngo une qa are gulbeingoqnim akamugetoqniy. Od, ningi nunngo kiki uratoqnsib olo akamoqniy. Osib nunngo arebolebole kobotosib olo are gulbeingoqneme. ¹⁰ Ningi Tamo Koba aqa ñamgalaq di nunngo segi ñam aguq atoqniy. Ningi degyqab di a na nunngo ñam olo soqfetngwas.

Ningi nunngo Kristen was nanngi uge qa minjraib

¹¹ O ijo was, ningi segi segi qa anjam uge maroqnaib. Tamo bei na aqa Kristen was qudei nanngi anjam uge minjraqas kiyo nanngo une qa nanngi peginjraqas kiyo di a dal anjam dego uge qa marsiq pegiyqo. Ningi dal anjam pegiyeqnu di ningi dal anjam dauryqa urateqnu. ¹² Qotei a segi na dal anjam babtej deqa a na qujai iga pegigwa kere.

A na qujai tamo unğasari nanğı elenqa kere. A na qujai nanğı padaltnjrqa kere. Niŋgi tamo kiyero deqa niŋgi na tamo unğasari nanğı peginjreqnub? Di kumbra uge.

Niŋgi nuŋgo segi ñam soqtoqnaib

¹³ Niŋgi qudei endegsib mareqñub, “Bini kiyo nebe kiyo iga qure beiq gilsim dia wausau qujai sosim silali qa wauosim olo bqom.” ¹⁴ Niŋgi degsib mareqñub. Ariya nebe kumbra kiye nuŋgoq di brantqas di niŋgi qalieqa keresai. Niŋgi ñam qurem bul sokiñalayosib koboqab. ¹⁵ Deqa niŋgi endegsib maroqñiy, “Tamo Koba a marimqa iga kumbra kiye yqa are qalsim yqom.” ¹⁶ Kiyaya niŋgi qudei olo nuŋgo segi ñam soqtoqñsib diqoqñsib laqñub? Nuŋgo kumbra di uge. ¹⁷ Ni geregere are qale. Ni kumbra bole qa qalieosim ariya ni dauryqasai di ni une yonum.

5

Tamo nanğı ñoro koba ti unub qaji nanğı awai ugedamu oqab

¹ O ñoro tamo niŋgi quiy. Bunuqna gulbe kokba nuŋgoq boqñqas. Niŋgi deqa pailoqñsib akamuge-toqñiy. ² Nuŋgo ñoro ti wala ti kalil ugeelenqo. Sisimbiñ na nuŋgo gara kalil dego ugeugeiyqo. ³ Nuŋgo gol ti silva ti di baisuwi na ugetqo. Deqa mondoñ baisuwi dena nuŋgo une boleq atsim ñamyuwo bulosim nuŋgo jejamu koitosim ugeugeiyqas. Niŋgi ñoro koba koroiyeb deqa diño bati qa niŋgi awai ugedamu oqab. ⁴ Niŋgi quiy. Nuŋgo wau tamo nanğı nuŋgo inğı meli gentoqñsib nuŋgo banq di ateqñab niŋgi na kamba olo nanğı

gisanjroqnsib awai oto nungo segi qa getentoqnsib oto segi nanngi enjreqnub. Deqa nanngi maoqnsib endegsib Qotei pailyeqnub, “O Tamo Koba, nanngi iga kumbra uge degsib egeqnub.” Yeqnaqa Qotei singila koba ti unu qaji a nanngo pailyo di queqnu. Deqa mondon a na nanngi awai uge engwas. ⁵ O ñoro tamo, nanngi gara bole bole jugoqnsib nunngo segi jejamu qa areboleboleingeqnaqa ingi koba uyeqnub. Deqa mondon Qotei na nanngi lungwas. Kaja nanngo jejamu diq diqeqnaq nanngo mandor nanngi na ñumeqnub dego kere Qotei na nanngi lungwas. ⁶ Nunngo kumbra uge bei agiende. Nanngi na kumbra bole yo qaji tamo nanngo jejamuq di une qamet-njroqnsib ñumeqnub. Ariya nanngi na kamba olo nanngi gotrangosaieqnub.

Ninngi gulbe qoboioqnsib Tamo Koba a olo bqajqa tariñoqniy

⁷ Deqa ijo was, nanngi nunngo are miligi singilatoqnsib gulbe qoboioqnsib Tamo Koba a olo bqajqa tariñoqniy. Ninngi asgingaiq. Ninngi wau lanja nanngi bul soqniy. Ninngi qalie, wau lanja nanngi asginjrosaiqnu. Nanngi ingi yagoqnsib awa qa tariñeqnub. Awa beqnaqa ingi melieqnaqa nanngi ingi meli di oqnsib uyeqnub. ⁸ Dego kere ninngi nunngo are miligi singilatoqnsib gulbe qoboioqnsib tariñoqniy. Tamo Koba a bqajqa bati jojomqo deqa ninngi degyoqniy.

⁹ O ijo was, nanngi Qotei aqa tamo ungasari qudei nanngi qa njirinoqnsib yomuqnaib. Qotei a nunngo une di unsim nanngi pegingo uge. Ninngi quiy. Une Pegiyo Tamo agi bqajqa jojomqo. A siranmeq di tigelejunu. ¹⁰ O ijo was, nanngi Qotei aqa medabu o qaji

tamo nanği qa are qaliy. Nanği nami Tamo Koba aqa ñam na anjam palontoqnebe deqa jeu tamo nanği na nanği ugeugeinjroqnebe. Ariya nanği Qotei aqa anjam marqa ulaosaioqnebe. Nanği nanço are miligi siŋgilatoqnsib jaqatiŋ oqnsib gulbe di qoboioqnebe. ¹¹ Niŋgi quiy. Iga endegsi mareqnum, “Tamo unğasari gulbe qoboioqnsib siŋgila na tigelejunub qaji nanği Qotei na taqat-njreqnu. Deqa nanği areboleboleinjreqnu.” Niŋgi Jop aqa kumbra qa nami quebe. Jop a siŋgila na tigelosiqa gulbe kobaquja qoboiesoqnej. Niŋgi qalie, bunuqna Tamo Koba a na Jop olo boletej. Od, iga qalieonum, Tamo Koba a gaigai iga qa duloqnsiqa iga qa are boleiyeqnu.

Niŋgi anjam bei marqa osibqa iŋgi bei na siŋgilataib

¹² O ijo was kalil, e anjam kobaquja bei unu. Anjam agiende. Niŋgi anjam bei marqa osibqa iŋgi bei na siŋgilataib. Niŋgi laŋ qure aqa ñam na anjam siŋgilataib. Niŋgi mandam aqa ñam na anjam siŋgilataib. Niŋgi od qa segi mariy. Niŋgi said qa segi mariy. Niŋgi degyqab di Qotei na niŋgi awai uge bei eŋwasai.

Tamo nanği kumbra bole bole yeqnu qaji nanço pailyo siŋgila koba

¹³ Nunço ambleq di tamo qudei nanği jaqatiŋ eqnub kiyo? Degamqa niŋgi na minjribqa nanği nanço jaqatiŋ deqa Qotei pailyoqnebe. Nunço ambleq di tamo qudei nanği areboleboleinjreqnu kiyo? Degamqa niŋgi na minjribqa nanği Qotei qa louoqnsib aqa ñam soqtoqnebe. ¹⁴ Nunço ambleq di tamo qudei nanği mainjreqnu kiyo? Degamqa

nıngı na minjribqa nıngı Kristen gate nıngı met-njrib bosib Tamo Koba aqa ñam na nıngı gateq di ban atetnjrsib goreñ bilentosib nıngı qa pailyebe. ¹⁵ Nıngı Tamo Koba a qa nıngı areqalo sıngilatosib pailyqab di a na tamo mainjro qaji nıngı olo tigeltnjrqas. Osim nıngı une yoqneb degamqa a na nıngı une kalil dego kobotetnjrqas. ¹⁶ Deqa ijo was, nıngı nungo segi segi une palontonsib Kristen was nıngı ubtosib minjroqniy. Osib nıngı segi segi qa Qotei pailyoqniy. Yim a na nıngı boletngwas. Tamo nıngı kumbra bole bole yeqñub qaji nıngı pailyo di sıngıla koba. Deqa nıngı pailyeqñab Qotei a quoqñsiqa nıngı anjam dauryeqñu. ¹⁷ Nıngı Elaija qa are qaliy. A iga bul mandam tamo. Ariya a endegsi pailyoqñej, “O Qotei, ni na lañ getentimqa awa bqasai.” A degsi pailyeqñaqqa Qotei na lañ getentonaqa awa bosai. Degsi sonaq wausau qalub bei oto koboej. ¹⁸ Onaqa Elaija a olo pailyonaqa lañ waqonaqa awa bej. Bosiq inñi inñi kalil melieliñej.

Kristen was bei a gam bole uratqas di iga na aqaryaiyimqa a olo Qotei aqa areq bqas

¹⁹ O ijo was nıngı quiy. Kristen was bei a Qotei aqa anjam bole dauryqa uratimqa tamo bei na a olo are bulyetqas di tamo dena aqa was kumbra bolequja yqo. ²⁰ Nıngı endegsib qalieoiy. Kristen was bei a une ti soqñim tamo bei na aqaryaiyimqa a gam uge di uratqas di tamo dena aqa was aqa qunun moiyo sawaq dena oqo. Deqa was di a moiqasai. Qotei na aqa une gargekoba kobotetqas.

Yesus Aqa Anjam Bole 2014
The New Testament in the Anjam language of Papua
New Guinea, 2014 revision
Nupela Testamen long tokples Anjam long Niugini,
2014

copyright © 2014 Wycliffe Bible Translators, Inc.

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-04-28

PDF generated using Haiola and XeLaTeX on 11 Nov 2022 from source files dated 9 Oct 2020

0eb339dc-c20a-5065-9483-338933d97585